

Lia Rumantscha convochescha ina maisa radunda

■ (LR) La Lia Rumantscha convochescha ina maisa radunda davart la debatta areguard rumantsch grischun u idiom en scola. Ils 10 da settember duain tut ils pertutgads elavurar cuminaivlamain soluziuns realisticas avant ch'il cussegl grond tracta l'october la nova lescha da scola. Tenor la Lia Rumantscha vai per bler dapli che per la dumonda rumantsch grischun u idiom en scola. I gjaja la finala per la dumonda da la relevanza dal rumantsch era sur ils cunfins regiunals e chantunals ora. Da quai resorta tenor la Lia Rumantscha la dumonda per la maisa radunda: «L'avegnir dal rumantsch en scola: la rolla dals idioms e dal rumantsch grischun». L'intent da la maisa radunda è da chattar soluziuns realisticas che duain vegnir integradas l'october en la debatta dal cussegl grond davart la revisiun totala da la lescha davart las scolas popularas dal chantun Grischun.

Vasta legitimaziun

La maisa radunda ha lieu ils 10 da settember 2011 a Cuira. Ils invits vegnan spediids ils proxims dis. A l'inscunter èn envidads ils suandants partenaris: tut las vischnancas rumantschas, la Gruppa rumantscha dal cussegl grond, cusseglier guvernativ *Martin Jäger*, la Pro idioms, la Pro rumantsch, la Scola auta da pedagogia dal Grischun, las Conferenzas da la magistraglia rumantscha, differents experts da scola, represchentants da las scolas medias ed auters pli. Tenor *Urs Cadruvi*, secretari general da la Lia Rumantscha, èsi impurtant che la legitimaziun da la maisa radunda



La Lia Rumantscha convochescha ina maisa radunda.

LQ

saja vasta. «Sche tut ils partenaris sa stentan a la maisa radunda da chattar vias pussaivlas ch'ins po enchaminar cuminaivlamain, avain nus ina schanza», manegia Cadruvi. «Ina schanza» cuntinuescha el, «da terminar questa debatta a favur dal rumantsch.» La maisa radunda vegn moderada da *Bettina Bickel-Jaques* da Rapperswil. Bickel è cussegliadra da communicaziun e mediatura diplomada.

Ina consequenza logica

Durant ils davos mais ha la Lia Rumantscha discutà intensivamain cun tut ils pertutgads, uschia tranter auter cun re-

preschentants da la Pro idioms e da la Pro rumantsch, dentant era cun exponents da las vischnancas cun scola idiomatica e cun represchentants da las vischnancas da piunier da rumantsch grischun. Durant quels discurs ha la Lia Rumantscha adina puspè punctuà ch'ella saja qua per tut las Rumantschas e tut ils Rumantschs. Tenor la Lia Rumantscha è la scola ina pitga centrala da la promoziun da lingua. La situaziun da partenza saja cumplexa e la prontezza da far cumpromiss saja per part pitschna, manegia Urs Cadruvi. Per quest motiv saja la maisa radunda ina consequenza logica.